

I waiatatia atu e ia te waiata nei i Owairaka, he kainga kei te takiwa o Maungatautari, kei waenganui o Parawera o Aotearoa. Hei reira hoki ka titiro atu ki Kakepuku maunga e tu ana māi i te tapa o te repo o Kawa e tata ana ki Te Awamutu; a kei ko atu ko Pirongia.

(Ref: J. 8/118, Si. p. 43. Tr. 3 471, T. Turi p. 20.)

Ka eke ki Wairaka¹ ka tahuri whakamuri,
 Kaati ko te aroha te *tiapu* i Kakepuku,²
 Kia rere arorangi te tihi ki Pirongia;
 Kei raro koe Toko,³ taku hoa tungane.
 Naku ano koe i huri ake ki muri;
 Mokai te ngakau te whakatau iho.
 Kia poruatia e awhi a kiri ana.
 Kotahi koa koe i mihia iho ai,
 Ko taku tau whanaunga no 'Toa' i te tonga,
 No 'Mania'⁵ i te uru, ka *pea*⁶ taua.
 I ngakau nui ai he mutunga mahi koe.
 Kati au ka hoki ki taku whenua tupu.
 Ki te wai koropupu i heria mai nei
 I Hawaiki ra ano e Ngatoro-i-rangi,⁷
 E ona tuahine Te Hoata-u-Te-Pupu;⁸
 E hu ra i Tongariro, ka mahana i taku kiri.
 Na rangi mai ano nana i marena
 Ko Pihanga⁹ te wahine, ai ua, ai hau.
 Ai marangai ki te muri-e. kokiri!

¹Wairaka.—Ko Owairaka, kua whakamaramatia i runga ake nei.

²Kakepuku.—He maunga kei te tapa o te repo o Kawa, e tata ana ki Te Awamutu.

³Toko.—Ko tetahi ingoa ko Te Mahutu, he rangatira no Waikato, no Ngati-Maniapoto.

⁴Toa.—Ko Ngati-Toa.

⁵Mania.—Ko Ngati-Maniapoto.

⁶Pea.—He kupu pakeha 'pair': ara ka taurite raua.

⁷Ngatoroirangi.—Ko te tohunga nui o runga i Te Arawa.

⁸Te Hoata-u-Te-Pupu.—Ko Te Hoata ko Te Pupu nga tuahine o Ngatoroirangi. I a ia i mate ai i te huka i runga o Tongariro, ka karangatia ki ona tuahine kia haria mai te ahi tipua i Hawaiki; koia nga puia.

⁹Pihanga.—He maunga kei Tokaanu, Taupo, e kiia ana i tautohetia e nga maunga nūnui e Taranaki, e Tongariro, a riro ana i Tongariro. Ko te Pukeronaki ta raua tamaiti.